

PLAN RADA STBIH ZA MANDATNI PERIOD 2025. - 2029.

STBIH

Sarajevo
17–18. 10.
2025.



Sindikrat radnika
trgovine i uslužnih
djelatnosti BiH

www.stbih.ba

**Povećanje
minimalne plate**
2025. godina

**Zabrana rada
nedeljom i praznicima**
2024. godina

**Povećanje
satnice**
2023. godina

Opisni

PLAN RADA STBIH

U skladu sa Strategijom STBIH za period 2025 – 2033. a uzimajući u obzir sve izazove te ciljeve koje STBIH ima u svom radu u Bosni i Hercegovini kao i u svojim regijama ali i globalno kroz parterstva i saradnje uspostavljene izvan granica BiH, 8.Kongres STBIH donosi sljedeći

OKVIRNI PLAN RADA ZA PERIOD 2025.-2029.

Sektor trgovine je stub svakodnevnog života i osnova ekonomije. Ipak, radnici u ovom sektoru često se suočavaju sa niskim zaradama, nesigurnim radnim odnosima, prekovremenim radom i nedostatkom institucionalne zaštite. To je globalni opis ovog sektora. BiH sa svim svojim specifičnostima i kompleksnim političkim sistemom dodatno komplicira i usložnjava procese u trgovini kao i radnička prava.

STBIH po prvi put u svojoj istoriji može reći da je postigao određeni nivo dostojanstvenog rada u svom sektoru. Pokrenute su mnoge inicijative za poboljšanje zakonskog okvira, donesena su i određena konkretna zakonska rješenja, a radnik/ca u trgovini je de facto više cijenjen od svog poslodavca nego što je to bilo ranije. To je dijelom i zbog generalnog problema koje BiH ima kao društvo a koje se ogleda u masovnom odlasku radnika iz BiH ali svakako i zbog očigledne promjene narativa na tržištu rada u BiH koje se desilo sa posljednjom promjenom vlasti u zemlji.

S obzirom da BiH ide prema Opštim izborima planiranim za 2026. STBIH je svjestan potrebe da zadrži dostignuti nivo radničkih prava. Jednako tako je svjestan i da su se već profilisale političke snage koje mogu nastaviti poboljšanje uslova rada kao i one koje za cilj imaju smanjenje istih.

U tom cilju kratkoročno ali i dugoročno kao opredjeljenje, STBIH planira

- **Organizovano djelovati u cilju uticanja na političke procese i izbore, s krajnjim ciljem zaštite i unapređenja prava i interesa radnika.**

U ovom smislu STBIH će napraviti jasan plan i program kao i listu prioriteta koje će ponuditi svim političkim strankama. Istovremeno ćemo posebno napraviti Plan kako očuvati pravo na neradnu nedjelju kao jedno od, nažalost i vrlo neutemeljeno, najkontroverznijih pitanja u 2025. i u skladu sa tim isplanirati detaljan strateški politički angažman.

STBIH planira konsolidovati i osnažiti organizaciju na svim njenim nivoima i to kroz:

- **Organizovanje**
- **Digitalizaciju svojih usluga i komunikacije sa radnicima**
- **Jačanje uloge pojedinca kao nosioca aktivnosti**
- **Partnerstva i savezi u zemlji i izvan nje**
- **Intenziviranje edukacijskih aktivnosti**
- **Nove inicijative za bolje zakone za radnike i nove kolektivne ugovore**

PLAN RADA STBIH

S obzirom da je STBIH već godinama svjestan izazova koje ima radeći u ovom vrlo specifičnom sektoru te da radnici od svog sindikata očekuju da bude tamo gdje su oni kao i cjeneci tehnološki napredak, STBIH planira napraviti digitalni komunikacijski kanal. Ovo je tehnički i finansijski zahtjevan projekat za koje se STBIH nada da će imati podršku svojih bratskih sindikata HK I Norge i drugih. Ovaj projekat bi proveli kroz cijeli mandatni period i uključivao bi niz aktivnosti poput lansiranja edukativne platforme: „Radnička škola za trgovce“, lansiranje mobilne aplikacije sindikata kao i digitalizacija prijema članova i potpune digitalizacije evidencije članstva. Poseban aspekt ovog projekta je i naplata sindikalne članarine za koju STBIH ima potrebu razviti sistem koji će biti digitaliziran i personaliziran.

U proteklom mandatnom periodu STBIH je sebi za cilj postavio jačanje svoje regionalne strukture što se u praksi pokazalo kao jako zahtjevan proces. Danas svjesni da je gro naših akcija imao ime i prezime u vidu aktivnih članova koju su preuzeli odgovornost i ulogu u za cijeli sindikat bitnim procesima, u narednom period želimo naglasak staviti upravo na taj individualni angažman te lični doprinos. U skladu s tim ćemo planirati i naše edukativne aktivnosti ali i formalan profesionalni angažman.

Partnerstava i savezi su jako bitna snaga STBIH i nadamo se da i u narednom periodu možemo računati na podršku HK I Norge. Također nadamo se da će OPIC iznaći načina da se naša saradnja nastavi kroz jačanje saradnje sa Handels Švedska ali i sa Sindikatima trgovine iz regije JI Evrope. Poseban akcenat je saradnja odnosno članstvo sa UNI Global Sindikatom od kojeg očekujemo specifičnu podršku u organizovanju u multinacionalnim kompanija i specifično u LIDL-u. Savez sindikata BIH konačno je regulisao svoje pravno djelovanje i iako nismo trenutno dio Saveza kao i da se ne slažemo sa politikom koju isti vodi kad je u pitanju organizovanje granskih sindikata očekujemo i pokušaćemo ojačati STBIH i kroz odnos sa Savezom sindikata BIH.

STBIH želi biti pokretač i kreator pozitivnih promjena na tržištu rada u BIH. Iz toga razloga ambiciozno planiramo pokrenuti inicijativu za donošenjem akta na nivou BIH čiji je cilj uspostavljanje jednakih minimalnih standarda radničkih prava u BIH i u tom kontekstu harmonizacija entitetskih akata. Ovo je vrlo zahtjevan i izazovan projekat te u tom smislu očekujemo pomoć i podršku niza relevantnih aktera.

Kao jedan od značajnih izazova za STBIH ali i logičan slijed njegovog napretka ističemo kolektivno pregovaranje na nivou kompanija. STBIH ima istoriju “kućnih” kolektivnih ugovora. U jednom periodu bio je jedinstveni primjer sindikata koji je pregovarao takav jedan KU na teritoriji BiH u kompaniji KONZUM BIH. U tom smislu planiramo u narednom mandatnom periodu reanimirati ideju “kućnih” KU koje uz podršku UNI-ja planiramo staviti i kao jedan od naših ciljeva u procesu organizovanja u multinacionalnim kompanijama.

Organizovanje je bilo i ostaje najvažniji prioritet i najbitnija aktivnost STBIH. Stalno povećanje članstva te povećanje članstva u periodu za 20% je naš najvažniji cilj.